



L E

MERCIMENT

DES CATHOLIQUES

*unis, faict à la Declaration & Pro-
testation de Henry de Bourbon, dict
Roy de Navarre.*

SUR la Declaration, SIRE,
que vous avez faicte le 4.
iour de Mars dernier pas-
sé, en qualité de Premier
Prince, & premier Magi-
strat de France. J'ay pris

la hardiesse de vous faire ce remerci-
ment, sur la resolution que moy, le moindre de
ce Royaume, ay peu entendre des Ca-
tholiques unis, par vne sainte & sacrée
deuotion à la conseruation de la Religio
Catholique, Apostolique & Romaine.
Vous vous estes bien tard aduisé d'escri-

re aux Estats de France, qui sont rōpuz
dés le 23. iour du mois de Decēbre pre-
cedant, & apres les massacres y commis,
emprisonnemens & autres forfaits con-
tre leur autorité & contre la foy publi-
que: Vous leur demandez qu'ils ayent à
requerir la diuersité de religion, & tou-
tesfois tous leurs cahiers ne tendoient
qu'à ce qu'il n'y eust qu'une Foy, qu'une
Loy, & qu'un Roy: & que vous comme
chef des heretiques, fussiez déclaré en-
nemy & incapable de ceste Couronne.
Nous vous remercions doncques bien
grandement, de ce que vous offrez & si
protestez d'employer vostre industrie,
vostre conscience, voz moyens, & voz
forces pour remedier aux troubles de la
France, & nous mettre en paix par un
meflange & embarrasement de diuerses
religions. Nous vous remercions, di-ie,
c'est à dire, nous ne voulōs point de vo-
stre remede, & vous prions de ne vous
point meller de noz affaires: Nous cer-
chons bien la paix, & serions bien mal-
aduisez, si nous fuyons ce seul & unique
moyen, de nous contenir en l'honneur
de Dieu, & en la conseruation de la so-

cieté humaine. Mais nous ne voulons pas nous ayder de voz moyens. Nous cerchons la paix avec Dieu, en l'honorant en nostre ancienne & asseuree religion, & nous conseruant noz villes, noz maisons, & famille, en vne seule opiniõ & conforme façon de viure, non entremeslee des disputes de voz Predicans, n'y bigaree de diuerses solemnitez, que vous voulez introduire par vne liberté de conscience. Nous entendons qu'en vne mesme lāgue, par la vertu d'un mesme sacrifice, sous la saincteté de mesme Sacremens, & par l'intercession de mesmes prieres, nous puissions tous d'une voix inuoquer la grace de Dieu, & en vne seule Foy, & vne seule Loy, nous asseurer les vns des autres. Et pour ce nous auõs fort à suspect la paix que vous nous presentez : Car en diuersité de religion, il y a peu de respect aux promesses des vns enuers les autres : & cõme vous dictes, *où Dieu est diuersement seruy, il est par consequent mal seruy*, qui est vne chose vraye. Car gens de deux religions ne se tiennent pas obligez de Foy l'un à l'autre, n'y ayant entr'eux de promesse dura-

ble. Tesmoing le serment de vostre mariage, & des Edicts de pacification, que vous n'avez obseruez, sinon entant que vous avez pensé, qu'ils vous donneroiēt moyen de respirer pour nous surprēdre plus à vostre aise. Et ce nous eust esté vn grand bien, qu'en la ville de Blois, aux Estats généraux que l'on y tenoit, pour se despaistrer de voz pernicieuses paix, nous eussions esté biē aduertis que chacun n'auoit pas vne pareille reuerēce au S. Sacremēt de nostre religion que nous auōs: & que nous n'eussions pas ignoré, ce dont vous nous assurez à present par vostre Declaration, que vostre innocence est imprimée dans l'ame & cōscience de celuy que vous appelez vostre Roy, & vostre souverain. Car nous ne nous fussions pas ainsi laissé surprēdre, & nous est vn grād malheur que de nous estre appuiez sur le serment d'un qui n'a vsé de noz Sacremens que pour se perjurer. Vous adioustez en vn autre endroict ces mots, Dieu à touché le cœur du Roy, il a pris la querelle pour moy. Et neantmoins sous pretexte de vous faire la guerre, il a leué vn nombre infiny de deniers sur sō peuple, & enuoyé Mō-

fleur de Ioyeuse avec quatre ou cinq cēs
 Gentils-hommes, contre vous à vostre
 compte, comme à la boucherie. Et puis
 qu'ainsi est que c'est pour l'amour de vo^r
 & pour vostre querelle, c'est à dire pour
 la religion Huguenotte, deportez vous
 si il vous plaist, & ne no^r importunez plus
 de voz offres. Ce n'est pas icy la premie-
 re fois que vous vous estes presēté pour
 Medecin de nostre maladie, & que vous
 en auez esté, cōme à present, éconduit,
 il faut laisser au malade de choisir son
 Medecin, & n'admettre pas ceux qui au
 peril de la vie du patient, se veullēt met-
 tre en credit. Et mesme sont à craindre
 vn tas d'Emperiques, qui ne se veullent
 aider que de remedes nouveaux, & non
 encor experimentez. Toutes nouveau-
 tez nous sont fort suspectes, & trouuons
 meilleur de suiure l'aduis commū & ap-
 prouué de toute ancienneté. La pauvre
 ville de Chastelleraud, ou vous auez cō-
 posé vostre recipé, est en dāger d'en souf-
 frir beaucoup, comme les autres villes
 que vous tenez par force, & les ingre-
 dians dont vous aidez sont de tres-fas-
 cheuse & perilleuse purgation: Car il n'y

a reliques ne gallices ny autres ornemēs
 del'Eglise qui n'en soient euacuez. Et de
 faiēt par vostre Declaration, vous pro-
 testez en ces mots, parlāt au Clergé: *Au*
lien ou i'ay puissance, ie leur tiendray quasi
tout: qui est pour monstrier le bien qu'il
 peut eſperer de voz remedes. Et certai-
 nement vous auez grace, quand dēs le
 commencement de ceste Declaration,
 vous confessez que vous estes *l'argumēt*
des tragedies de France, c'est à dire le subiet,
 le principe, & le motif de tous les mal-
 heurs que nous auons en ce miserable
 Royaume: & combien que *vous puissiez*
pardonner à vous mesme, ce neantmoins vous
dictes, que vous en estes l'occasion. Qui sont
 les propres mots de vostre Declaration
 laquelle nous faiēt ébahir, que vous van-
 tez de pouuoir apporter le remede con-
 uenable à nostre douleur: de façon que
 vous tēdez de guerir le mal de nostre vl-
 cere, par la cause mesme de la blessure.
 Qui est vn mauuais methode & qui est
 fort reietté entre les plus experts Mede-
 cins, si ce n'est par le moyen que vous
 cottez en disant, *que vous voudriez auoir*
estaint le feu de nostre fieure, & n'estre plus.
 Nous

Nous vous prendriõs volõtiers au mot,
 & croyons que ce seroit vn grand prepara-
 ratif de nostre guarison: mais vous nous
 en ostez bien tost l'esperance, quãd vous
 protestez de maintenir toutes sortes de religiõ,
 & y employer toutes voz forces au peril de
 dix mil vies. Car celà ne s'accorde pas, à
 ce que vous confessez, qu'ou Dieu est di-
 uersement seruy, il est par consequent mal ser-
 uy. Il est vnique & ayme l'vnité de ses
 creatures: Ioint aussi qu'autrefois en la
 ville de Montauban, incontinent apres
 la mort de Mõseigneur le Duc d'Anjou,
 conferant avec le sieur Roquelaure, &
 vostre ministre Marmet, de ce que vous
 auiez à faire, vous pristres resolution, par
 l'aduis & cõclusion du feu President du
 Ferrier vostre Chancelier, que iamais
 vous ne changeriez de religion, & main-
 tiendriez iusques au dernier soupir de
 vostre vie, la doctrine en laquelle vous a-
 uiez esté institué & nourry, par les mini-
 stres de la secte de Calvin. Et sur ceste
 deliberation, vous feites vne assemblee
 de tous voz confederez, ou se trouuerët
 deputez d'Angleterre, de d'Annemark,
 de Geneue, de Sedan, Et sur tout ce qui

fut remarqué, le sieur d'Espérnō s'y trou-
 ua, & promistes de ne iamais dissimuler
 vostre religion. Et ainsi nous sçauons
 bien que vous perseuererez, ne voulant
 pas estre accusé de legereté, enuers tant
 de Princes & Seigneurs. Car c'est vn vi-
 ce dōt vous ne voulez pas estre mescreu.
 Et de faict quelque protestation q̄ vous
 faciez maintenāt, de maintenir les deux
 religions, si est-il certain, que vous auez
 promis à voz ministres de les conseruer,
 qui est à dire ruiner les Catholiques. Car
 les Huguenots s'aident de deux moyens
 comme nous faisons, à sçauoir de Pre-
 dications & de la force. Et puis que les
 Predicans Huguenots nous reprochent
 estre heretiques, & qu'ils ont presché, &
 faict des liures, pour mōstrer que les he-
 retiques doiuent estre bruslez, il s'ensuit
 que par la force vous entendrez mainte-
 nir ceste proposition, & par voz armes
 effectuer ce que voz Predicans veulent
 persuader par leurs raisons. Et que la li-
 berté de cōscience que vous promettez
 à present, n'est qu'en attendāt que vous
 puissiez establir l'autorité que vo^r pre-
 tendez auoir en ce Royaume. Vous in-

gerant desia d'y vser de commandemēs
& de menaces à ceux qui ne voudront
vous obeir. Et de faict, vous protestez
que ce n'est sinon pour ceste heure, que
vous entendrez maintenir diuersité de
religiō: c'est à dire iusques à ce que vous
soyez le plus fort, voulāt gagner le Cler
gé par ces paroles: Quant à leur profession
& leur religion, en quelque chose ie leur suis
cōtraire, en nulle leur ennemy: en d'autres nous
sommes d'accord, ne fusse qu'en ce qui touche
la cōseruation des priuileges de l'Eglise de Frā
ce & libertez: c'est à dire quād il est que
stiō de dénier l'autorité de nostre saint
pere le Pape, & renuerfer toutes les con
stitutions de l'Eglise vniuerselle. Car les
polytiques de nostre temps l'interpretēt
ainsi, & l'estendent aussi auant qu'il plaist
aux Huguenots, puis après vous adiou
stez: Quoy que soit si i'auois avec eux toutes
les prises du monde, ie les mettrois sous le pied
pour ceste heure, emporté par vne plus forte
consideration, qui est le seruice de mō Roy, &
du bien de cest estat: qui est pour monst
rer qu'en attendant vostre meilleure com
modité, vous preferez l'esperance que
vous auez au Royaume, à ce que vous

estimez estre agreable à Dieu. Et voylà comme nous ne sommes pas ignorās quel est l'intellect de vostre protestatiō, disant : *Je proteste que tout ainsi que ie n'ay peu souffrir que l'on m'ait contraint en ma cōscience, aussi ne souffriray-ie, ny ne permettray iamais, que les Catholiques soient contraincts en la leur, ny en leur exercice libre de religion:* ce sont paroles pour vous insinuer en quelque bonne opinion. Et en lisant cela il nous est souuenu des priuileges & dispēces octroyez par voz ministres aux Huguenots leur permettant de passer au trauers noz Eglises, pour y prendre leur plus court chemin, ou bien de s'y tenir à la suite de quelqu'un à qui ils eussent à faire. Car c'est ainsi que vous pretendez vous faciliter & abreger le chemin du Royaume de France, & pour vostre cōmodité. Comme petit à petit l'on fit en Angleterre, & vous l'avez obtenu en Biart, où il n'y a pour ceste heure Catholique, qui ose paroistre, & ne sont pas en seurēté, mesme dans les plus tenebreuses caues de leurs maisons : & par tout où vous commandez absolument, vous tenez le peuple en telle frayeur, que vous

leur faictes demãder & cõsentir ce qu'il vous plaist. De sorte que pour n'encourir les peines de voz menaces, il est facile de faire demander aux Estats, ce que bõ vous semble. Et c'est ainsi que vous voulez que lon tienne vn Concile national libre, c'est à dire, ou vous soyez le plus fort, & en la congregation duquel, vous parueniez à mesme effect, qu'en l'assemblée des Estats tenuz à Blois, que vous approuuez : *Et protestez de faire recognoistre l'autorité du Roy*, quand par la mansuetude de son naturel, en fauçât sa foy, il a proditoirement faict assassiner les Princes Catholiques, emprisonner les autres, rompre les Estats, & effaroucher de telle façon tous les deputez des provinces de ce Royaume, que le plus hardy d'entr'eux n'a plus garde de demander l'assemblée des Estats, sous son auctorité, n'y sous la vostre. Et sil n'y est autrement pourueu par les moyens que Dieu nous fera la grace d'auoir, no' laisserions desormais plustost tout deperir, que de demãder reformation, qui nous mette à telle difformation. Ce sont les effects de voz ministres beau Sire, quãd

par leur nouuelle doctrine, ils ont persuadé, que les Sacremens de nostre Eglise ne sont pas obligatoires : vous auez raison de recongnoistre les Princes de Lorraine, pour voz proches parens, gens de valeur & de seruices. Car quãd vous feites contenãce par l'espace de trois ou quatre ans d'estre Catholique, ils vous ont aimé, chery, & honoré, autant que iamais vous eussiez sceu souhaiter, & ne vous ont laissé que lors que vous auez abandonné l'Eglise de Dieu. Et si le Roy eust voulu se seruir d'eux, il eust esté le plus grand & le plus heureux Prince de la Chrestienté. Mais le malheur en a dict autrement à la Frãce, par le ministere de ceste Huguenotte heresie, ou plustost de l'atheisme, en introduction & meffange que l'on veut faire de diuerses religions. Si vous estiez en ceste qualité receu nostre Roy, lon pourroit faire cõparaison de celuy qui espousant vne iuste & loyale femme, reserve toutesfois de coucher avec sa concubine. Et neantmoins vous nous dictes *que nous prenions le chemin de vous instruire, & que nous y profiterõs beaucoup.* A vous ouïr parler, vous n'estes

plus heretique, mais parauenture auez
 passez outre. Car il n'y a heretiques, que
 ceux qui ont quelque religion obstinee,
 & si desia vo' nous promettez que nous
 profiterons à vous instruire, vous auez
 donc esperâce de paroistre Catholique,
 & parauanture nous ne le prometterez
 vous ainsi, sur vne foy semblable, que
 celle qui nous fut iuree à Blois pour vo-
 stre querelle. Et sur laquelle il y a toutes-
 fois occasiõ de craindre, que nous n'euf-
 sions aussi mauuaise yssue de vostre pre-
 tenduë innocence, que nous auõs eu de
 la bonté & clemence de celuy que vous
 appelez vostre Roy, & souuerain. Il est
 bien vray que vous pensez auoir trouué
 ouuerture d'accord entre nous, *en nous*
rangeant à ce que decernerá vn Concile libre,
 c'est à dire, ou vous soyiez en seureté, &
 non pas nous, tout de mesme que pour
 voz pretentions contre Monseigneur le
 Cardinal vostre oncle. Car pendát qu'à
 la hôte de ses nepueux, il est prisonnier,
 vous estimerez estre en liberté de con-
 ferance avec luy, pour vider la questiõ
 sur laquelle sont esmeuz les troubles de
 France. Et cõbien que vous disiez qu'ils

sont fondez sur la vaine & imaginaire
 crainte de vostre succession à cest estat, Si est-
 ce que vous nous donnez bien à enten-
 dre qu'elles sont voz pretentions, quand
 desia par ceste Declaration vous nous
 commãdez de poser les armes, avec me-
 naces de nous punir, si nous y contreue-
 nons. Et les lettres de proximité q̃ vous
 avez obtenuës, & autres voz actes, font
 bien paroistre qu'elle est vostre intentiõ,
 pendant l'euenement de laquelle, vous
 demandez vn Concile. Mais qu'elle ap-
 arence y auroit-il de demander vn Cõ-
 cile nouveau, veu que les precedans, &
 principalement celuy de Trente, qui est
 exprez, ont desia condanné vostre he-
 resie. Et est certain que sur vne mesme
 heresie, lon ne tient iamais deux Conci-
 les, & suffit qu'elle ait esté vne fois con-
 damnee. Ioint aussi que ce n'est à nous
 qu'il se faut adresser, pour demander vn
 Concile general. Que si vous entendez
 vn Concile national, ja Dieu ne plaise
 que pour vne dispute qui appartient à
 toute l'Eglise, lon nous accuse d'en vou-
 loir seuls determiner en nostre país. Les
 Conciles nationaux, ne sont que pour
 ce qui

ce qui est propre & particulier à la nation :
 mais nostre religion est commune à toute
 l'Eglise vniuerselle, hors de laquelle
 nous ne deuons, ny ne pouuons rien de-
 liberer. Car ce seroit nous mettre au ha-
 zard de nous separer de l'Eglise Catho-
 lique, Apostolique & Romaine, hors de
 laquelle nous croyons fermement, qu'il
 n'y a point de salut, & sçauons bien que
 toutes les oppositions que lon a formé
 cōtre la publication du Concile de Tré-
 te, ne sont qu'en vostre faueur. Car hors
 mis la cōdamnation particuliere qui est
 de l'heresie de Calvin, il n'y a rien qu'une
 repetition de l'ancienne ordonnance &
 discipline de l'Eglise : & ceux qui disent
 que le Pape y est mis par dessus le Cōci-
 le, & qu'il y a des constitutions cōtraires
 à l'ancienne liberté de la France, s'abu-
 sent, & s'ils auoient pris la peine de le li-
 re, ils congnoistroient le contraire. Je
 dis exprez de l'anciēne liberté de la Frā-
 ce, & non pas des nouuelles licences, &
 debordemens que les heretiques y ont
 scandaleusement introduit : de sorte que
 vostre demāde n'est iuste ne raisonnable,
 quād vous tendez à vn Cōcile national,
 contraire aux Conciles generaux. Ce

que nous croyons, nous ne le voulons plus reuoquer en doubte: comme aussi par tant de colloques, & disputes, nous auōs apperceu que les authoritez & raisons n'ont de rien seruy, & n'est pas possible d'apporter aucune chose de nouveau, qui n'ait desia esté ditté, & escrite, & ne nous estât point venu de nouveaux textes d'Euangile, il ne sortiroit rien de noz docteurs, que vous n'ayez assez ouy, & si ne voulons point de voz raisōs, qui n'ont esté que par trop entenduës. C'est à faire à gēs qui doutēt de leur croyāce, de demander estre instruits, cōme aussi feroit-il difficile, de definir vn Concile libre, & du tout impossible de l'executer encor. Je vous demanderois volontiers, qui c'est que vous entendez faire Iuges de nos differens. Ce seroient parauātūre des Polytiques, que n'ayans point de party, nous accorderoiēt facilement, en mettāt au neant l'vne & l'autre religion. C'est ce disent-ils, entendre les affaires d'Estat, que de se lacher la bride de ceste façō, & vaguer à volōté en ses discours, sans s'abstraindre aux regles de l'Eglise, mais faire comme chacun l'entend, par vn droict de biē-seance. Nous en sentōs

les effectz, par les ingenieuses subtilitez des Partisans, & libertins, qui sans loy, & sans religion, ont accommodé le public à leur particulier. Ce sont d'estrangés reformateurs, que ces Messieurs là. Et eust grace vn iour le Lieutenât de S. Maixen par vn apophitegme q̄ merite d'estre mis en memoire. Car ayant esté decernees commissions aux Conseillers d'Estat, pour aller par tout le Royaume, sçauoir les plaintes du peuple, c'est à dire decou-
rir quel il y faisoit, & trouuer moyen de nouveaux subsides. Comme vn certain Prelat eust deux & trois fois sommé le corps de ville, de luy declarer ce qu'ils auoiēt à dire, pour en dresser son procez verbal, il ne peust rien tirer de l'assemblee, ny bon ny mauuais, & la raison luy en fut expliquee par ce Lieutenant, qui dist que les habitâs se gardoient de mes-
prêdre, & qu'ils craignoiēt qu'en recitâs leurs douleurs, ils fussēt surpris du costé où ils auroient oublié de se plaindre, ay-
mans mieux ne riē dire, qu'en comptant leur miseres, dōner ouuerture de les aug-
menter, par mauuaises drogues. Ainsi l'assemblee des Estats nous a esté per-
nicieuse, ne nous ayant apporté chan-

gement, que de mal en pis : aussi vostre nouveau Concile nous attraperoit, à quelque sinistre euenement, & vaut mieux suiure noz premieres brisees, & nous efforcer avec la grace de Dieu, de nous deffaire de ceux qui causent tous noz maux : voire mais vous dittes qu'aussi bien n'y gagnerons nous rien, & que l'heresie se doit combattre *par disputes, & non par armes*. Enquoy il me souuient d'un ieune Aduocat, lequel voulant s'aduācer au barreau de la plaidoirie, soustenoit qu'il ne falloit pas punir les coupebources, & qu'aussi bien quelques punitions quel'on en ait faict, le nombre n'é amoindrissioit pas, & qu'il falloit plustost les admōnester. Ce qui auoit plus d'apparence que vostre propositiō : car les coupebources se trouuēt volōtiers aux meilleures predications, où il y a plus de presse, & non pas les huguenots qui ne veullent entendre ce quel'on leur dict. Et sur ce que vous dictes, *que lon vous à sommé de changer de religion la dague en la main*, vo^{re} faictes tort en la reputatiō de Mōsieur le Cardinal de Lenoncourt, lequel vous a esté trouuer plusieurs fois, avec plus de submissions, & nouuelles

fortes de persuasion, que beaucoup de gens de biē n'eussent desiré. Et les bōnes gens de docteurs de Sorbonne, que lon vous enuoya pour vous prescher à l'ancienne mode, n'auoient point d'armes, & toutefois vous n'en teintes compte. Aussi estiez vous biē aduertý de la bōne volonté que vous confessez à présent, que le Roy vous porte. Ce qu'il ne peust dissimuler en vne petite forme d'Estats, qu'il tint à S. Germain en Laye, sur la fin del'annee mil cinq cēs quatre vingts & quatre. Car Mōseigneur le Cardinal de Bourbon luy ayant proposé que les plus importantes affaires du Royaume, estoient d'exterminer les heretiques, & n'auoir qu'une religion, il s'esmeut de telle façō qu'il en perdit contenance, & se courrouça si aigrement, qu'à peine le pouuoit-on apaiser, & par là fut facile de cognoistre que la diuersité de religiō luy plaisoit. Et voilà la paix en laquelle vous voulez nous entretenir, pour quelque temps, cōme vous dites, à fin de mieux paruenir à voz desseins : & bref nous voyons bien que par la mort & emprisonnement des chefs des Catholiques, vous pēsez auoir ville gaignee, & voulez

dire en sōme, que vous ne ferez pas des nostres, & que si nous voulons auoir la paix avec vous, il faut que nous soyons tous huguenots. Mais croyez, Sire, que nous n'en ferons rien, & que nous n'auons pas noz biens, noz maisons, noz vies, celles de noz femmes, & de noz enfans, si chers, que nous ne les vouliōs preposer à la grace de Dieu, & à nostre salut, que nous croyons fermement n'estre hors l'Eglise Catholique Apostolique & Romaine. Nous auons appris par les Histoires, que le Royaume de Frâce, à Sainctement assis la premiere pierre de son fondement, sur l'apuy de ceste religion, que par le moyen d'icelle, il fest acquis de grandes victoires, fest conserué contre ses ennemis, & a gaigné l'honneur & la reputation par dessus toutes nations. Nous auons sceu que ceste religion, est l'assurance du peuple enuers les Roys: nous ne la voulons pas perdre. Et quiconque ne voudra tenir la loy du Royaume, ne fera point nostre Roy. Car comme le peuple ne faict pas luy seul le Royaume, aussi le Roy n'est riē sans le peuple, & par vne reciproque & mutuelle concordance, le Royaume

se maintient. Et quicōque le premier ne veut tenir ce qui est de son deuoir, & enfraint la loy du Royaume, faulſe ſa foy, & rend l'autre party quitte de la ſienne. C'eſt la differēce que touſiours on a faiēt d'un Roy à un Tyran, que l'un commande par les loix, & l'autre ſelon ſon plaſir, & licentieuſe ſouueraineté. Nous ne ſommes point ſubjects à la Tyrannie. Mais nous voulons obeir à un Roy ſelō l'ordōnance du Royaume: nous deſirons eſtre vnīs en l'obeiſſance de noz loix, & que par l'obſeruāce d'une meſme religion, nous ſoyons par les Sacremens d'icelle aſſeurez de la foy des vns enuers les autres. Nous ne voulons tenir pour compatriotes, ceux qui nous appellēt idolatres. No^r ne voulōs point que vous auctoriſiez les mariages que l'Egliſe à declaré inceſtueux, & que vous faciez que ceux là ſoient noz heritiers, que nous ne voulons pas aduoüer à parēs. Nous ne voulōs partager avec ceux, qui ſe ſont vouez dās les monaſteres, & leſquels nous ne recognoiſōs pour noz coheritiers: & ne dites pas que cela ſoit pour faire un eſtat populaire, n'y pour émouuoir les villes contre la nobleſſe.

Car les Gētils-hōmes y ont autāt, voire plus d'interest, que le reste du peuple. Quād no^r no^r mettōs en leur protectiō, quād nous frayōs aux armes, desquelles nous leur laissōs la cōduittē, quād nous leur deferōs les hōneurs & prerogatiues qui leur sont deuës, quand nous les exhortōs de valleurēsemēt combattre, & leur commettons les gouuernemens de noz villes, ce n'est pas pour esleuer le peuple contr'eux. Et vous qui voulez faire tout le contraire, ne trouuez pas estrāge, si vous n'estes pas creu, deportez vous, si vous plaist, de nous presenter vostre paix, qui depuis 25. ans & d'auātage no^r a continuellement diuisez & entretenu en querelles & guerres: Aussi bien esperōs nous que Dieu nous fera la grace de nous maintenir contre voz menāces, & voz forces, & contre vostre protestatiō, nous protestons au cōtraire, d'employer noz moyens, & noz vies, pour nous garantir & conseruer. J'ay dit.

F I N.